

# Sorumutuk Konsellu Ministrus nian iha loron 30 fulan-dezemburu tinan 2020

## Prezidénsia Konsellu Ministrus

VIII Governu Konstitusionál

---

### Komunikadu Imprensa

#### Sorumutuk Konsellu Ministrus nian iha loron 30 fulan-dezemburu tinan 2020

Konsellu Ministrus hala'o sorumutuk iha Palásiu Governu, iha Dili, no aprova ona projetu Dekretu Governu nian ne'ebé apresenta husi Primeiru-Ministru iha Ezersísiu, José Maria dos Reis, kona-ba **medida sira ba ezekusaun estadu emerjénsia nian, ne'ebé renova husi Dekretu Prezidente Repúblika nian N.73/2020, loron 30 fulan-dezemburu**, atu hatán ba pandemia COVID-19. Estadu emerjénsia, ne'ebé agora renova ne'e, abranje territóriu nasional tomak no hahú vigora husi tuku 00:00 loron 3 fulan-janeiru tinan 2021 to'o tuku 23:59 loron 1 fulan-fevereiru tinan 2021.

Dekretu Governu nian ne'e rekomenda katak ema hotu-hotu ne'ebé la sujeita ba izolamentu obrigatóriu no ne'ebé la ezerse kualkér atividade profisionál ka dispensadu husi devér atu marka prezensa iha serbisu-fatin, tenke hela iha uma, no só bele sai husi uma bainhira presiza duni.

Kona-ba regra distansiamentu sosiál nian iha fatin públiku, Dekretu Governu nian ne'e obriga atu ema hotu-hotu ne'ebé la sujeita ba rejime izolamentu obrigatóriu, bainhira la'o ain iha fatin públiku, tenke la'o mesak, no uza máskara no mantein distánsia, pelumenus, metru ida husi ema la'o ain sira seluk no evita halibur malu. Ema hotu-hotu tenke mantein mós distánsia, pelumenus, metru ida bainhira hein hela oportunidade atu tama ba loja laran, fatin prestasaun servisu nian ka fatin servisu administrasaun públika nian, no iha fatin atu hein transporte públiku tula pasajeiru nian.

Bandu atu hala'o sorumutuk ka manifestasaun, nune'e mós kualkér eventu sosiál, kulturál ka desportivu ne'ebé implika ema halibur malu na'in sanulu resin. Proibisaun ida-ne'e la aplika ba prátika desportiva individuál, ne'ebé la halibur ema barak.

Bandu mós atu realiza kualkér eventu ho karakter relijiozu, liu-liu selebrasaun kultu hirak ne'ebé halibur ema na'in sanulu ba leten. Realizasaun funerál tenke adota medida hirak ne'ebé prevene tranzmisaun virus SARS-CoV-2 nian no labele implika prezensa husi, iha tempu hanesan, ema na'in sanulu ba leten.

Transporte públiku tula pasajeiru nian bele halo sirkulasaun, maibé veíkulu hirak ne'e tenke fase loro-loron molok hala'o atividade, no motorista, tripulasaun no pasajeiru sira tenke uza máskara taka ibun no inus nian. Pasajeiru sira, bainhira bele, tenke evita forma kontaktu fíziku nian sa'ida de'it entre sira.

Merkadu sira no estabesimentu komersiál, industriál no artezanál ka estabesimentu prestasaun servisu nian hotu-hotu bele funsiona nafatin. Ema sesé de'it maka hakarak tama iha estabesimentu ka resintu hirak-ne'e tenke uza máskara, fase liman no halo distánsia, pelumenus, metru ida husi ema seluk. Responsavel sira husi merkadu no estabesimentu sira-ne'e nian tenke kria kondisaun hirak ne'ebé presiza ba kumprimentu regra hirak ne'e nian no sei la fó tama ema ne'ebé la kumpre saida maka

hatuur ona liubá ne'e. Regra hirak ne'ebé temi liubá ne'e aplika mós ba instalasaun sira, iha ne'ebé servisu públiku sira funsiona.

Vendedór ambulante sira tenke mantein distánsia, pelumenus, metru ida husi sira-nia kliente ka vendedór ambulante sira seluk no tenke uza permanente máskara taka ibun no inus nian, no fase liman halo mós nafatin.

Diploma ida-ne'e la bandu atividade letiva no la'ós letiva husi eskola sira, iha iha atividade la'ós letiva nian la inklui atividade ho karakter lúdiku, rekreativu ka serimoniál. Norma profilasia nian ne'ebé nesesária no conveniente atu prevene no kontrola epidemia COVID-19 aprovalu husi diploma ministeriál hamutuk husi membru Governu hirak ne'ebé sai nu'udar responsavel ba área saúde, edukasaun no ensinu superiór nian.

Ajente sira husi servisu seguransa nian tenke sensibiliza ema hotu-hotu atubele kumpre saida maka hatuur iha Dekretu Governu nian ida-ne'e. Ajente sira husi forsa seguransa nian identifika ema hirak ne'ebé la halo tuir orden ne'ebé fó-sai no hato'o keixa ba Ministériu Públiku kona-ba saida maka kontese, no ema sira-ne'ebé viola, sei asume responsabilidade kriminál, tuir saida mak Kódigu Penál hateten.

Ema hotu-hotu ne'ebé hakarak tama ka sai husi territóriu nasionál tenke sujeita ba kontrolu sanitáriu. Mantein mós obrigatoriedade atu sujeita ba kuarentena, ho durasaun mínima loron sanulu-resin-haat, no ba teste COVID-19 nian, ba sidadaun sira ne'ebé hakarak tama iha país ida-ne'e, ne'ebé hatudu sintoma COVID-19 nian, ka halo ona kontaktu ho ema ne'ebé infetadu husi SARS-CoV-2. Despeza hirak ne'ebé iha relasaun ho kuarentena, ema ida-idak maka sei responsabiliza bainhira kuarentena halo iha estabelesimentu saúde nian, iha uma ka sentru izolamentu privadu.

Kontinua bandu ema atu hakat fronteira atu halo tradisaun ka kostume ka atu hetan asesu ba merkadu reguladu, no ninia sansaun sira mantein. Ema estranjeiru ne'ebé hakarak tama iha territóriu nasionál, liuhusi fronteira rai-maran, sujeita nafatin ba autorizasaun prévia. Ministru Interiór, liuhusi diploma ministeriál, bele determina atu taka temporariamente postu fronteira sira ka hamenus oráriu ba atendimentu púbiku iha postu hirak ne'e.

Durante vijénsia estadu emerjénsia nian, lisensa, autorizasaun no atu administrativa no dokumentu sira seluk válidu nafatin la haree ba ninia prazu validade nian.

Hetan ona mós aprovasaun maka Rezolusaun Governu nian, ne'ebé **renova impozisaun serka sanitária ida iha Rejiaun Administrativa Espesiál Oekusi Ambenu (RAEOA)**, haree ba kazu SARS-CoV-2 nian hirak ne'ebé diagnostika ona iha rejiaun ne'e no atu kontrola saúde pública husi populasaun RAEOA nian no impede tranzmisaun lokál SARS-CoV-2 nian iha territóriu nasionál. Ho projetu Rezolusaun Governu nian ida-ne'e, postu fronteira nian ne'ebé eziste iha RAEOA sei taka hotu no bandu dezlokasaun, liuhusi rai-maran no tasi, entre rejiaun ne'e no munisípiu sira seluk to'o tuku 23:59 loron 18 fulan-janeiru 2021. Durante período ne'e, la bandu transporte merkadoria nian.

Ikusliu, Konsellu Ministrus deside kansela serimónia hasa'e bandaeira, iha segunda, loron 4 fulan-janeiru tinan 2021, nune'e mós selebrasaun natál no tinan foun iha administrasaun pública. **REMATA**

url: <http://timor-leste.gov.tl?lang=tp&p=26390>